

四庫全書

史部

欽定四庫全書

禮部志稿卷五十四

明 倪汝楫 編

列傳

尚書李時

李時河間任邱人舉弘治壬戌進士改翰林院庶吉士授編修武廟初為經筵講官以孝宗實錄成陞侍讀尋陞右諭德上即位充日講官預修武宗實錄陞侍讀學

士累陞禮部侍郎尚書贊上分建四郊成累加太子太保進武英殿大學士尋改吏部尚書是歲彗星見時陳言三事曰務安靜惜人才慎刑罰頗及大禮大獄諸臣上日御便殿章奏軍國重事必召時面決及人才賢否民間利病悉以諮詢甲午加少保皇史宬成加太子太師尋加少傅進謹身殿九廟成加太子太師進華蓋殿上數幸山陵時嘗扈從命直宿行殿側以便召對眷遇隆厚尋卒上深悼之賜祭塋如例贈太傅謚文康時以

謙和得士心恪慎稱上意秉政數年雖無大匡弼而議論嘗在寬平天下稱為長者

尚書黃綰

黃綰字宗賢浙江黃巖人正德中以祖廕授後軍都督府都事嘉靖改元為南京都察院經歷以議大禮與張桂合遷南京工部員外郎謝病免歸未幾復起為光祿寺少卿與修明倫大典尋陞大理少卿改詹事府少詹兼侍講學士充經筵講官大典成進詹事久之進南京

禮部右侍郎轉禮部左時大同軍亂後反側子猶攘臂
彭嘯人心諮詢代王請大臣安集上命綰往綰撫輯流
亡分別善惡悉索其倡亂黨與誅之還奏稱旨母憂服
闋即其家拜禮部尚書兼翰林院學士撫諭安南未行
落職閒住卒于家綰有文學明習國家故事博辯捷給
更幹亦敏贍故雖起家任子致位八座人不以為忝然
其傾狡善變不專一節初以講學取聲譽比議禮見舉
朝不悅復首鼠避去事定乃復揚揚自負力附張桂鋤

所憎忌嘗上書以隱語撼大學士楊一清公論惡之及
夏言有寵復附言而非張孚敬迹其終始真傾危之士
也

尚書張璧

張璧湖廣石首人中正德辛未進士改翰林院庶吉士
授編修乾清宮災上言修德勤政講學三事上即位璧
侍講筵武廟實錄成陞春坊諭德管理誥勅陞太常寺
卿兼侍讀學士掌院事戊戌獻皇帝實錄成陞禮部右

侍郎南京禮部尚書改禮部尚書兼翰林院學士尋兼東閣大學士入閣辦事明年加太子太保卒于官壁性醇實周慎卿行甚篤侍上講幄最久多所裨益而輔政不逾數月故勲業無聞焉訃聞命尚書宋諭祭于邸舍贈少保謚文簡遣官護櫬還詔有司營塋

尚書費宋

費宋字子和江西鉛山人正德辛未進士改翰林院庶吉士授編修時寧庶人宸濠潛蓄異志求復護衛宋與

從兄大學士宏極言其不可予遂忤權倖意褫職罷歸
上御極用薦復還舊職尋充經筵官與修武廟實錄成
陞左春坊左贊善遷南京尚寶司卿尋改左庶子兼侍
講掌南京翰林院事累陞禮部侍郎兼學士掌院事踰
年進尚書掌詹事府事尋命回部自是舉大典禮儀朝
政咸盡力焉以太廟成加太子少保滿三歲考秩進太
子太保復加少保疾作卒于官賜祭塋如例謚文通

尚書孫承恩

孫承恩直隸華亭人正德辛未進士改翰林院庶吉士授編修嘗奏進歷代帝王詩贊賜名鑒古韻語奉使安南與脩明倫大典成擢左春坊中允充經筵講官主考兩宮鄉試陞侍讀學士掌南院召為少詹事兼侍讀學士已進禮部右侍郎經筵日講轉吏部左侍郎掌詹事府事乙巳大察為言官所論上特留之丁未會試主考擢禮部尚書仍掌詹事府已回部管事以病疏乞致仕明年上恩之召還故任加太子少保供撰玄文疏請皇

子講讀不報癸丑二月復乞致仕賜馳驛歸尋卒賜祭
塋如例贈太子太保謚文簡

尚書徐階

徐階字子昇直隸華亭人年二十一登嘉靖癸未進士
殿試第三人授翰林院編修首揆張孚敬緣上意請正
孔廟祀抑詆王號下儒臣議相顧攝訖母敢異同者階
獨條具其三不必五不可狀甚晰疏上得旨外補添註
延平府推官遷黃州府同知陞浙江僉事提督學校尋

改督學江西陞副使皇太子出閣陞司經局洗馬兼翰林院侍讀進國子祭酒久之擢禮部右侍郎遂遷吏部未幾改兼翰林院學士教習庶吉士踰年掌翰林院事復充會典副總裁尋擢禮部尚書學士如故禮部之為政者久好以寬大遠弊至階而肅然更始凡王國爵封秩謚併文武大臣陳乞祭葬皆衷之以請報可著為令莊敬皇太子薨階議喪禮以上及百官皆朞服百官仍詣門哭上不憚謂天子絕朞不制服其百官服可無詣

門哭臨禮着詣停柩所輔臣遂欲以青衣角帶往階曰
未有哭臨而不衰服者定議以齊衰服臨上是之令宮
中仍服衰遂命為莊敬冊謚副使已命題主上察階慎
勤召入直無逸殿廬給供饌如例尋賜飛魚服遂連上
疏請立皇太子不報蓋次當繼莊敬而立者裕王是為
穆宗而景王與同歲差少中外未測上旨恐有釣奇者
故請之亟云最後當冠及婚禮開講皆請以齒叙先裕
而後景復不允無何詔二王婚俱出就外邸疏諫又留

中萬壽節推恩加太子太保冠薄都城請赦諸邊將在
獄者詣行營自効報可復疏請上還大內及召羣臣面
計兵事上褒其忠愛遙有從敵歸者以敵求貢書聞上
以示階及輔臣嵩等且召對便殿上顧謂當何處分階
曰請計緩之遣譯者至營而詰之以無番文故且徵其
情實實則令暫出邊用先首長例貢馬行賞互市往返
少日我城中之備完而援兵日益集敵且退不退我從
而拒之可十全上稱善者再出而會廷臣議階言貢不

可許遂兼酌以請會首飽去乃下階疏不許貢上又密
諳階善後事階疏上上皆虛以聽焉太宰缺廷推階當
補上不允謂方侍朕左右何輒擬外遷無何孝烈祔廟
之議起初孝烈皇后崩上欲祔之廟而念壓于先孝潔
皇后又睿宗入太廟非中外公論恐千秋萬歲後所祧
主非仁宗而睿考遂下部議欲以孝烈先祔階議以為
女后無先入廟者上大怒令再議階不獲已乃小婉其
詞請于太廟奉先殿各增二室而升祔孝烈皇后則仁

宗不必祧而孝烈可速祔上愈怒從更議祧仁宗祔孝烈階雖不獲守前說然天下信其為正大帥仇鸞驟有寵利諾延之弱欲掩之以為功請征之下階與兵部議階不可遂弗果征尋以薦帥獲間功上手註加少保久之命兼東閣大學士叅預機務仍掌禮部事候代者服除而後解階疏辭不允歷少師兼太子太師建極殿大學士隆慶三年致仕歸萬曆十年卒年八十一贈太師

謚文貞

尚書歐陽德

歐陽德字崇一江西泰和人嘉靖癸未進士初知陸安州遷南京刑部員外郎會上擇諸臣有文行者列侍從改翰林院編脩充經筵官稍遷南京國子監司業歷南京尚寶司卿太僕寺少卿南京鴻臚太常寺卿尋以太常寺卿掌國子監事數月擢禮部左侍郎改吏部左侍郎兼翰林院學士掌詹事府事充會典總裁教習庶吉士明年主考庚戌會試以母喪歸從服中起禮部尚書

兼翰林院學士直無逸殿尋卒晉太子少保祭葬褒卹
如例謚文莊德宇度宏粹孳孳講學務以真知實踐為
主接引後進如恐不及其才具敏贍施于有政率當事
理協人情措畫所及即可傳之永久在禮部嘗議建儲
議二王婚禮雖時與上意忤然上察其持正卒優容之

尚書袁煥

袁煥浙江慈谿人嘉靖戊戌進士及第授翰林院編修
遷侍讀尋撰玄文甚稱上旨自是眷遇日隆後以次遷

掌南京翰林院事煥疏願留上悅擢侍講學士甫數月
手詔進禮部右侍郎尋加太子賓客兼學士賜一品服
會日食陰雲不見煥言不宜行敕護禮禮卿吳山不從
竟循例救護上以是不悅山而以煥為尊上山既罷即
晉煥太子少保禮部尚書數日召入直南郊禮成疏請
祈雪雪降上益悅加太子太保戶部尚書武英殿大學
士入閣輔政尋加少保復進少傅兼太子太傅建極殿
大學士前後恩賜廷臣中鮮有其比者尋引疾歸行至

安山卒訃聞賜祭塋贈少師謚文榮

尚書嚴訥

嚴訥字敏卿南直常熟人登嘉靖辛丑進士選為翰林庶吉士授編脩九載遷侍讀上日坐行宮為祠釐自大相以下皆應制有所撰述不給乃悉以翰林諸臣名覆之金甌而探之得二人訥與焉遂下制當撰述訥惶恐拜命旦夕恪恭其事以是得上心賞賚屢下俄為學士視院篆進太常少卿主已未會試遂進禮部左侍郎事

其長恭有所裨贊皆絕不以語人尋改吏部遂進禮部
尚書禮部所治多藩國封繼喪葬之事一切為吏賄數
訥委其屬精覈之事取故典不輕為難易以是肅然亡
敢挾賄進者知壬戌貢舉尋吏部以尚書闕請上即詔
用訥訥自學士以至天官凡六轉皆不繇廷推俄召直
西苑特加太子太保尋特勅進武英殿大學士仍視吏
部事俟代者服除而後解始訥為學士時官五品上特
賜鶴袍謂此一品服服之重祠釐而其後遂益賜之麒麟

麟飛魚服以至繡蟒他尚方什器珍饌兼金楮幣之屬
無虛月然素小心及居大位過自抑愈于庶僚時無何
以賜直舍稍庳而近濕遂成中滿疾畏上嚴不敢亟請
告首輔階為上言其病狀始聽馳驛歸久之卒賜祭塋
如例謚文靖

尚書陸樹聲

陸樹聲字與吉直隸華亭人嘉靖庚子魁于鄉明年辛
丑舉會試第一廷對二甲第四選翰林院庶吉士壬寅

歸省三載始北上授編脩庚戌廷試充掌卷官壬子丁
父憂服闋久之不出丁巳即家拜南京國子監司業一
就職即請告歸辛酉起左春坊左諭德掌留院篆旋召
還坊不赴乙丑進太常寺卿管南京國子監祭酒事立
教務持大體畧去煩苛先本實而後藝文其年秋進吏
部右侍郎引疾不就穆廟即位特旨起原官又屢疏辭
已再起原官兼翰林院學士掌詹事府敎習庶吉士
赴召抵淮復請告返壬申即家拜禮部尚書兼學士疏

辭不允時神廟初嗣位以碩德清節首膺簡召中外相
賀遂以是冬詣闕蒞部率正僚屬引經誼以裁典禮操
持凜凜無敢干以私北首邀增歲幣樞臣將許之樹聲
以職力爭不可樞臣竟不能奪時江陵當國樹聲以先
進執禮不少屈尋抗疏乞歸溫旨勉留遣中使問賚及
門請去益決疏五上乃得賜告乘傳歸瀨行疏陳十事
皆關大計而辨官府抑戚倖斥躬瑞尤觸時忌江陵敗
臺諫奉詔舉海內耆德三十七人以之為首自是薦剡

無虛歲而高卧彌堅終無世念戊子年八十詔撫按官
奉彩幣羊酒及門存問已復加太子少保歲給廩米與
夫戊戌年九壬寅皇太子立凡兩遣官存問大臣三
奉恩詔亦故事所未覩也尋卒享年九十有七訃聞上
震悼立詔所司治葬賜祭贈太子太保謚文定樹聲為
人脩長峭岸氣骨稜稜神襟道朗舉止端凝終日燕居
衣冠危坐不見跛倚之容持正深堅議論皆有根柢無
少唯阿而寬容樂善常依長者不忍有所刻核登科六十

餘年而家居者十之七始終一節士論高之

尚書萬士和

萬士和字思節直隸宜興人嘉靖庚子舉于鄉明年成進士選讀中秘書屬分宜柄政紕之當署諫垣力請得儀制主事改南為兵禮二部郎中晉江西按察僉事遷副使督貴州學政歷叅政按察使左右布政使應天府尹道拜都察院右副都御史督南畿餉已遷戶部右侍郎總督倉場改禮部尋遷左會華亭罷相起新鄭遂引

疾疏四上乃得予告歸神宗即位特詔以南少宗伯攝
大司成事從民望也已大宗伯陸公樹聲致政去江陵
欲傳公論收士譽遂召為禮部尚書士和見民間服用
無度瞿然曰敷下乃爾何以觀四方因條上崇儉數事
會審祲雜襲又奏杜倖門容慙直汰冗員抑干請以回
天意語多切至觸時忌有方士倚大璫謀得官江陵主
之士和持不可成國公薨江陵欲贈之王士和又力持
不可於是江陵嘆之有阿陵意者劾其羸懦宜罷遂力

求去竟賜傳歸江陵敗復起之南禮部而再疏引年特
加資政大夫正治上卿致仕士和褪身嚴不錯寸趾蒞
官不為赫赫名其當事蹇蹇有壁立萬仞之操其歿也
天子為輶朝一日諭祭葬如例贈太子太保謚文恭

尚書余繼登

余繼登字世用直隸交河人嘉靖甲子以詩舉京兆萬
歷丁丑成進士選庶吉士授檢討癸未分校禮闈是歲
纂修會典越五年書成進脩撰己丑充經筵講官旋擢

右春坊右中允兼編脩簡直日講辛卯典試留都壬辰陞右諭德兼侍讀癸巳轉左庶子甲午進少詹事兼侍讀學士充正史副總裁旋擢詹事掌翰林院事丙申拜禮部右侍郎戊戌知貢舉尋轉左郊廟大禮攝正卿以行時禮卿闕且二年廷臣所推舉無慮數十上皆留不下及再始以繼登名上名又在後上竟用焉在位執法守政夙夜勤恪遇天地大苗時政闕失抗事力諫無少規隨戊戌歲終舉奏四方所報地震雷火及西寧鐘自鳴

紹興地出血二氣舛錯古所未有今郡國元元苦征調
酷椎織造開採抑鬱無聊易動難安幸上心惟天心圖謝
過之實疏入報旨惕然明年九月太白經天狹道山崩
湧出山五復上言方今星躔失度水旱為沴鑿山開礦
地藏空虛不能固脉山崩川竭陵谷變遷閭閻窮困郡
邑蕭條戾氣凝而不散怨毒結而成形甚可憂也臣子
不能動君父言愈數愈厭陛下為天之子天以非常譴告
尚可恬然數日不報繼登見士習文體日趨浮詭深用

為憂上言今俗不遵聖經倡為異說竊佛氏諸言爚亂
耳目謂經籍傳註皆為糟粕倫理法度皆為虛幻惟一
了此心則踰閑蕩檢無害性真後學小生轉相崇尚雜
入制義名為新說甚悖理傷化宜絕其端勿使進奉旨
挈為功令下學官釐正焉公自署部時請元子冠婚疏
凡九上及正卿席並請建儲又至八疏病甚猶伏枕視
草牘之上意感動勅所司為具將行大禮而竟以疾卒
于位訃聞上深嗟悼詔贈太子少保謚文恪賜祭塋如

例遣使護其喪歸

禮部志稿卷五十四

欽定四庫全書

禮部志稿卷五十五

明 俞汝楫 編

列傳

侍郎世家寶

世家寶蒙古人姿貌豐整善言論性剛果有謀畧讀書知兵元末以集賢院學士守膠東登萊等郡洪武元年大將軍徐達下山東參政傅友德兵至萊陽世家寶以

所守城降授大理寺少卿尋改禮部侍郎二年陞刑部尚書未幾以事貶知廬陵縣召還授兵馬指揮司副指揮改兩浙運鹽使司同知十五年知臨安府秩滿賜致仕還家後復至京遣賑濟廣東興寧長樂二縣二十七年卒於家

侍郎傅瓛

傅瓛初名玳元末入仕留侍左右吳元年陞中書省參知政事本年詔定律令命為議律官諭瓛曰汚染之民

以善道之則可以復生求生於重典是索魚於釜也及
律令成付按察司巡歷州縣使內外知所遵守洪武元
年正月命兼詹事府丞二月同右丞相李善長學士陶
安進郊社宗廟議八月京師火帝謂京師省臣曰近京
師四方水旱相仍朕夙夜不遑寧處豈刑罰失中武事
未息徭役屢興賦斂不時以致陰陽乖戾而然耶卿等
同國休戚宜輔朕修省以消天譴璫等對曰古人有言
天心仁愛人君則必出災異以譴告之使知變自省人

君遇災而能警懼則天變可弭今陛下修德省愆憂形於色居高聽卑天寶監之顧臣等待罪宰府有乖調燮貽聖衷憂咎在臣等帝曰君臣一體苟知誠懼天心方回卿等其盡心力以匡朕之不逮二年改禮部侍郎三年以年老致仕

侍郎曾魯

曾魯字得之臨江新淦人幼聰敏記誦過人元末舉進士不第即棄去博覽羣書無所不記國朝初與修元史

史成又與修禮書遂擢禮部祠部主事開平忠武王常
遇春薨高麗遣人來祭魯索其文觀之外則襲以金龍
黃帕內則不書洪武之號魯責之曰龍帕或是悞用若
納貢稱藩而不奉正朔君臣之義安在使者愧懼謝過
即令易去之四年冬安南國王遣使來貢主客曹受
其表將入見魯取其副視之曰前王乃陳日煙今表曰
叔明必有以也亟白尚書詰之使者不敢諱蓋日煙為
叔明逼死而代其位中心懷懼故托貢以覘朝廷意上

怒曰島夷乃狡猾如此却其貢不受五月二日上問丞
相曾魯今何官職對以禮部主事即日超遷中順大夫
禮部侍郎曾以順字犯父諱辭就朝請下階吏部以法
有定制不之許倭夷入寇戍將捕獲之詔命儒臣草詔
歸其俘曾所撰有一視同仁之語上喜其言為得體八
月奉旨考京畿鄉試既入院忽吐血自是遂奄奄九月
膏露降鍾山羣臣皆獻頌魯為賦以進獨見稱許以為
鋪叙有法既而疾甚上章乞骸骨詔許之十二月舟歸

至南昌之石岐潭而卒。魯為人和厚，其貌癯然，若不能勝。衣家故儲書甚多，魯皆一一校讐，其訛舛有六，一居士集考異，今行於世。卒年五十四。

侍郎劉崧

劉崧字子高，吉安泰和人。元季嘗領鄉薦，遇亂不及會試，教授鄉里。國朝洪武三年，以材學舉至京，授兵部職方郎中。陞北平按察司副使，居官以清苦自持，坐事輸作京師，尋放歸鄉。十三年春，丞相胡惟庸等誅，上特賜

手勅起為禮部侍郎未幾命署吏部尚書事以疾乞致仕許之已而上思其老成宿學遣使以國子司業起之一見歡甚賜以鞍馬居位未十日遽得疾猶強坐訓諸生疾革祭酒李敬問所欲言崧曰天子遣崧教國子將責以成功而遽死乎無一語及家事卒年六十一上重惜之親為文以祭之曰惟爾有學有行發譽儒林朕嘉爾能屢常擢用邇者遣使召爾司業成均簡在朕心期於成效夫何不數日間遽然而逝朕甚悼焉已令有司

備禮殯殮靈車歸葬特以牲醴致祭崧博學有志行家
素貧及貴未嘗增置產業居官十歲不以妻子相隨清
苦如布衣時其為北平按察副使攜一童往至則遣還
每夜孤燈一榻讀書不輟至五更則衣冠起坐待旦值
北平兵革之後招徠逋逃慰安反側惟務寬厚以存大
體尤慎刑威之用遇小人檢校輒先事防制溫顏異詞
而見者凜然及致仕而歸益自謙下問學之功老而彌
篤與人言未嘗及官政歲歉其姻族之人不能自養者

輒周給之崧馳歷中外尤以文學受知於上其為文雅粹為詩有唐人風韻所著有北平八府志東遊錄嶺南錄及詩文十八卷藏於家又有職方集行於世

侍郎陳思道

陳思道字執中浙江山陰人父谷深居鑑湖濱且耕且讀教授鄉之子弟生四子思道最幼負奇氣穎悟出倫日記數千言見者每以公輔奇之及對人言曰吾必為吾父償書債洪武三年開科取士遂領鄉薦登乙丑進

士授刑部主事執法不回二十年朝廷知其賢驟銓兵
部右侍郎益勵風節雖至戚信友不敢干以私繇是名
譽日彰寵遇日盛二十一年轉禮部左侍郎二十二年
三疏乞歸養家居不植生業儼然居官之日郡邑長令
非有劇政造廬請議不得一見與鄉人則恂恂且善屬
詩文時推正直有行義必以為稱首云

侍郎張衡

張衡字子平江西萬安人洪武乙丑進士授禮科給事

中疏奏剗劫二十年擢禮部右侍郎有才幹二十二年轉左侍郎奏定洪武禮制定式會歲行郊祀選百官行最者十三人登壇分獻衡與馬太祖屢嘉其清慎以其事載大誥每宣召輒呼為瘦張而不名二十二年九月諭衡同左都御史詹徽等曰有司供宴擾民今後支與官鈔布政司一千貫以下令詳議以聞十月衡等奏行遵守凡遇正旦聖節冬至分宴錢於本處官錢內支給無府州縣都司衛所移附近有司闢用每節布政司一

千貫在城都司衛所附郭大小衙門官吏師生耆民俱
赴本司筵宴府有都司七百貫以下各有差州有衛五
百貫縣有衛四百貫以下有差無有司衛四百貫所一
百五十貫後又議有司官朝覲每員給盤費鈔一百貫
在任歲支柴炭鈔五十貫又定引錢為堂食費未幾以
言事忤旨卒於官

侍郎凌漢

凌漢字斗南河南開封人洪武十七年以舉秀才擢司

經局正字未幾出知會稽以事逮繫浙江按察司獄上
知漢無罪獄為按察使陶熾所淹命械熾還釋漢與俱
來既至拜監察御史巡按陝西奏陝西民病數事二十
一年又以不受私遺陞右副都御史尋陞右都御史時
詹徽為左都御史論議數不合每面折徽徽銜之奏遣
按事蘋松還朝以失職為監察御史桂滿所劾左遷刑
部侍郎二十四年命署吏部數月改禮部右侍郎又數
月上以漢年老令歸鄉里漢叩頭曰臣願生居京都死

陞京土上許之命居於私第

侍郎黃觀

黃觀字伯瀾池州貴池人父贅於邑城許氏生觀遂從母家姓明尚書補邑諸生受業於元翰林待制黃暉暉死王事觀益砥礪以忠義自許洪武甲子貢入太學是歲領鄉薦擢外艱起復仍入監造詣日益深同舍推服嘗繪父母墓為圖攜以自隨閱之淚輒下辛未會試廷試皆第一拜翰林院修撰日侍御前敷奏明爽上甚愛

重每賜顧問命編寫省貪等錄上以其有政事才凡法司諸榜文令觀撰成即書之又令清理軍職貼黃兼管註銷諸司案牘侍東宮講論累遷尚寶司卿禮部右侍郎乃奏復其姓會更官制進本部侍中壬午五月往上游諸郡徵兵至安慶聞內難已平慟哭謂人曰吾妻子有志節必不肯受辱明日家僮自京逃來言將執家屬夫人翁氏出通濟門先擰二女於河即自沈焉觀遂招魂葬之江上舟次李陽河乃朝服東向再拜於羅刹磯

湍急處給舟人奮棹佯為洩解投水死時年三十九都察院右都御史陳瑛言觀及周是修等不順天命請加追謫文皇帝曰彼食其祿自盡其心爾竟不問永樂末詔觀親黨有編伍者皆釋之

侍郎陳性善

陳性善名復初以字行浙江山陰人洪武中以春秋魁鄉試丁丑會試列名上第臚唱時上見其凝重屬目久之謂侍臣曰向唱名陳性善者君子人也授行人司副

已而改翰林院檢討初誠意伯劉基卒上遣御史李鐸
往取其遺書基子璉即出觀象玩占於石室中鐸詣闕
上之上簡精楷書者數人入便殿繙錄性善預焉上天
威嚴重進見者皆惶汗甚或掣肘不成一字惟性善動
止安雅既竣書法端妍上嘉悅命賜以酒是時威譴巨
測性善淹留竟日家人以為必死既出莫不大驚久之
超拜禮部左侍郎薦達流人薛正言輩前雲南右布政
使韓宜可方隸謫籍亦以性善言起為副都御史自建

文君在東宮時已熟性善名及即位一日退朝獨畱性
善賜之坐問以治天下之要且使書於紙以是性善感
知遇盡所欲言朝廷悉從之然施行未竟輒為權奸所
攻性善朝見曰陛下不以臣愚猥承顧問臣既僭塵上
聽許臣必行今而詔書云然所謂為法自戾陛下無以
信天下矣未幾成廟入靖內難上命性善監李景隆軍
大戰白溝河敗績性善與大理寺丞彭與明欽天監副
劉伯元指揮王賚等皆被執以去文廟悉縕遣之性善

朝服躍馬入於河以死內難平詔加追戮徙其家屬於
邊後悉赦還

侍郎董倫

董倫字安常故山東恩縣人世居燕之宛平自處山林
間布褐藜藿已懷憂世之志學者多從之遊以所居貝
州因稱貝州先生元末徵辟不出世高其行國初擢用
單縣儒士張以寧以倫薦徵為春坊贊善大夫賜冠帶
事懿文皇太子陳說多長厚語太祖高皇帝聞善之繇

右春坊右贊善陞左春坊大學士賜文綺六疋鈔五十
錠會東宮宴駕二十五年出為河南左參議盡心民事
名其退食思政之堂曰後樂方孝孺為之記嘗草封事
數千言無一不當上心者又上書薦肇州吏目諸葛伯
衡太祖遠擢為陝西右參議三十年以詿誤免官典教
滇南東宮憐其老賜以白金若干鑑倫行至成都蜀獻
王深寵之賦詩八章以道行至滇凡作養成就用夏變
夷漸摩膏肓皆出於仁義道德故雖蠻童夷豎皆知向

方建文帝即位眷念東宮舊臣屢詢及之左右亦多言
倫可用召至京師慰勞備至拜嘉議大夫禮部右侍郎
兼翰林院學士與方孝孺同入內閣侍經筵御書怡老
堂及鬆几玉鳩杖各一賜之初監察御史解縉以權臣
讐嫉譖之謫河州衛吏縉與倫書祈援歲餘倫為之言
乃召縉還以為翰林待詔其汲引人才類如此倫為人
質直敦厚富文學為時所重建文間屢懇言當務親睦
不聽文皇即位時倫年八十餘有奇令致仕出京悒悒

成疾數日卒

侍郎宋禮

宋禮字大本河南永寧縣人幼穎悟知讀書稍長益有志於學期將以自見繇是鄉校以明經充貢禮部補太學生以才能選者皆待以不次歲庚午遂擢山西僉事持法嚴峻鋤奸剔蠹無少貸郡縣百司素貪戾為掊尅者皆側足屏息相戒莫敢犯禮於善惡之數苗薅髮櫛無所私三晉之間率皆想望其風采以有所庇依癸酉

以考滿上天官改除戶部山西司主事遂日治簿書會計之務惟允愈益有聲己卯復除為陝西按察司僉事其施於政者皆如在山西時而關右所仰望倚賴之者亦若三晉之民焉未幾復入為刑部員外郎值成祖即位之初命署禮部事是時詔勅號令封拜朝覲會同宴饗賞賚之事皆出禮官禮酬對捷給咸克稱旨遂擢禮部右侍郎踰月轉左永樂三年陞工部尚書

侍郎楊砥

楊砥字大用山西澤州人洪武甲戌進士授行人司右
司副上疏言漢楊雄仕莽為大夫劇秦美新之論取譏
萬世董仲舒三策及正誼明道之言足以扶翼世教今
孔子廟從祀有雄而無仲舒臣愚以為退雄進仲舒庶
合萬世公論太祖高皇帝從之陞湖廣左參議建文時
遣李景隆等攻圍北平城砥上言帝堯之德始於親九
族今當務惇睦不宜加兵自翦其附枝附枝盡而根本
廢矣為齊黃輩所忌斥罷之成祖即位起為鴻臚寺卿

喪父盧墓側者三年服闋陞禮部左侍郎坐巡河渠失職降工部主事改禮部永樂十年命簡閱北京郡縣馬陞太僕寺卿明年兼苑馬寺卿砥率勵僚屬凡孳牧之法與民之利病悉條奏行之馬大蕃息母喪賜鈔千錠命護喪歸葬哀毀致疾未至家而卒上悼惜之遣官賜祭砥剛介勤敏居官有操其孝行尤為人所稱

侍郎王彰

王彰字文明河南鄭州人初為太學生奉命往山東催

糧益兵儲同行者受賄慢事彰數讓之不從竟坐賄敗
彰遂以廉勤知名擢為吏部源士踰年草源士改給事
中陞都給事中再陞刑部員外郎遂陞山西布政司參
政永樂五年召拜禮部右侍郎時四方萬國奉玉帛重
譯以朝覲賓貢者肩背相望於京師賞賚燕享無虛日
與尚書鄭公賜同德協恭奉職惟謹明年以父喪去服
闋改戶部右侍郎奉命祀西嶽還言陝州及新安民有
鬻男女償負租者遂下詔蠲所負租官為贖還所鬻改

都察院右副都御史從車駕巡狩北京時其母年八十
持命歸省且諭之曰君子守官不忘親居家不忘君凡
所過民之安否吏之賢不肖汝宜用意歸悉以聞既還
奏上嘉悅陞右都御史明年復命省母是歲河南水災
民多流亡而長吏不恤遂奏黜其貪尅百餘人罷不急
之徵十餘事招復流民發廩賑貸多所濟活遇惡必去
強寇敗道路及妖尼煽惑為亂悉捕誅之彰為人恂恂
而謙恭莊重人莫敢干以私但用法過刻其母屢以為

言彰不能改時劉觀為左都御史人云彰公而不恕觀私而不刻衆以為確論

侍郎儀智

儀智高密人溫重端毅縣教官歷高郵知州寶慶知府所至寬厚得民陞通政司右通政兼左春坊中允數月陞湖廣布政使簡易凝重得藩臣體後坐累被謫湖廣都指揮使龔忠入見上問湖湘間老儒宜有存者對曰臣愚不能盡識以臣所識儀智固老儒也然坐小累斥

矣即日召之既至以為禮部左侍郎遇事是是非非不肯附會嘗正旦日食上命禮部尚書呂震議免賀禮震心以為宜賀智力為震言不可毋貽後悔上聞智言曰是朕心也竟免賀上命吏部翰林院簡求老儒授皇太孫經同以智薦上喜曰得之智侍皇太孫數年啓迪匡益克盡其誠年八十乞致仕賜勅獎諭遣歸以永樂十九年四月卒洪熙元年上思先朝舊勞贈太子少師謚

文簡

侍郎吾紳

吾紳字叔繕浙江衢州人擢永樂甲申進士選為庶吉士入翰林讀書因同列言理刑事成祖聞之遂俱擢刑部主事治獄寬平有名尋陞郎中超拜禮部右侍郎上謂尚書呂震曰吾紳出自翰林可佐卿典禮矣既而為震所擠出為廣東右參政尋復職改南京刑部奉命考察兩廣福建方面官有參政素貪墨結權要且以紳為故僚友紳竟黜之時稱其公還朝復禮部卒於官紳性

率直於人短長無所較視榮辱若不以介意初拜侍郎時衣冠畢賀而一室蕭然了無供具有謂之曰拜官不祀先會客乎紳笑唯而已

侍郎郭敦

郭敦字仲厚山東堂邑人洪武中以太學生擢戶部主事歲餘陞衢州府知府咨訪民隱草弊興利郡俗貧死不能葬皆焚屍棄江敦相郊外得隙地百餘畝榜曰義阡令葬貧者又為條約教民患難相助民利賴之禁止

淫祠同官有私取民財敦雖不面斥而義形於色其人
悔謝改過亦改容待之屬邑吏皆爭自濯磨敦舍內蠶
箔嘗有叢絲類織成擊帶修廣合度郡人謂其仁政之
應在衢七年操守甚嚴一志愛民永樂初坐累徵入京
師耆老數十人伏闕乞留不可皆涕泣去後廷臣有薦
敦廉正不阿以為監察御史尋陞河南布政司左參政
無幾調陝西以公務留京師成祖皇帝聞敦有大臣體
召見陞禮部右侍郎兼太僕寺卿洪熙中進戶部左侍

郎兼詹事府少詹事宣德二年陞戶部尚書陝西旱民困命隆平侯張信及敦往撫之敦至悉草宿弊奏請蠲逋負賑貧乏實邊儲考黜貪吏罷不急之務凡十數事上悉從之歲餘召還敦忘身愛國知無不言及得疾上聞之命御醫往視竟卒年六十有二上悼惜之賜祭命有司治墓敦性純厚事親孝閨門肅然於人不苟合公暇手不釋卷永慕之操無遜古人雖位列六卿而泊然布素身沒之後家無餘貲

侍郎鄒師顏

鄒師顏湖廣宜都縣人洪武間以國子生擢兵部主事陞工部員外郎又陞江西布政司左參政永樂初坐事陞監察御史後陞大理寺丞仁宗皇帝嗣位陞禮部右侍郎未幾告歸省墓既還至通州病疽卒訃聞遣官賜祭令有司治奠行在禮部尚書呂震言師顏家貧不能歸喪上曰朕聞其人清慎其卒可惜遂命給官舟載歸因謂左右臣曰為官而貧可嘉今豈獨鄒師顏但朕未

悉知耳自今京官終於位者皆倣此例師顏小心謹畏廉介自持蒞事周密人不敢干以私而議者頗譏其近刻云

侍郎張瑛

張瑛字子玉順德府邢臺縣人洪武丙子鄉舉授陝西寧州訓導調武德衛再調宿遷縣永樂戊子秩滿九載特擢吏科給事中宣宗皇帝時為皇太孫始親學遴選儒臣俾司伴讀瑛與焉仁宗皇帝踐祚陞春坊中允未

幾陞諭德尋改洗馬宣宗皇帝繼統之初錄瑛舊勞陞
行在禮部右侍郎宣德改元遷左侍郎兼華蓋殿大學
士入與內閣機務丁未陞尚書仍兼職預修成祖仁宗
皇帝實錄為總裁官既而調南京禮部甲寅丁外艱詔
復起之賜御製詩十餘軸楮萬縉年六十有二卒訃聞
遣官奠祭瑛儀觀魁梧持己莊重別歷兩京無所建白
文章政事皆非所長云

侍郎李嘉

李嘉字允堅宛平縣人初事成祖文皇帝於藩邸為奉
祀所禮生丁父憂哀毀動人終喪不飲酒食肉而盡誠
養母文皇帝靖內難預效守城勞初授鴻臚寺序班陞
通政司叅議後坐累左遷鴻臚寺丞仁宗皇帝臨御陞
左通政又坐累左遷未行宣宗皇帝嗣大統復通政使
改北京工部侍郎又改禮部侍郎嘉雖老日勉強職事未
嘗少間再歲以疾聞賜勅命致仕數月卒年七十遣官
賜祭命有司治喪葬嘉持身端謹一介不苟取予治家

整肅教子孫必務學然胸中狹隘蒞事瑣碎無大臣體

侍郎李琦

李琦真定府元氏縣人洪武末年以文學授滄州訓導坐事謫戍雲南草除中以經明行修再薦擢監察御史尋遷大理寺副復坐事謫雲南永樂元年上書陳情召試御史會交南侵廣西地命琦往琦以書喻援引趙佗呂嘉逆順禍福之理并道路遼遠炎涼俱不足恃凜然可懼安南感悟遂歸侵地還奏稱旨實授廣西道監察

御史宣德元年陞行在禮部右侍郎後占城與安南交惡復命琦往喻之兩國遂和自是西洋諸番有事悉令往焉所至無不款服四年改湖廣布政使琦簡易有識量而善談論故數奉使遠夷及在湖廣政譽靡聞以朝覲至京吏部言其老不任事遂令致仕

侍郎蔣驥

蔣驥字良夫浙江錢塘人第洪武庚辰進士擢行人永樂初詔文學之臣纂修高廟實錄驥預焉書成陞翰林

檢討修永樂大典為副總裁前翰林學士解公縉出為
交趾叅議以事逮獄坐連累拘幽者十餘載中局坦然
以書史自娛未始有幾微怨懟仁宗即位宥復前官踰
月陞左春坊左司直郎宣宗嗣統之初以宮僚恩遷翰
林院侍講宣德紀元奉命祀東鎮洎大禹南宋諸帝陵
歸朝與修兩朝實錄書成賜白金文綺陞侍講學士尋
陞禮部右侍郎視事幾二旬得疾遽卒遣官賜祭命有
司治墓驥天性孝友嘗迎父就養京師朝夕起居侍養

備至兄弟三人友愛無間言素善筆札奉命書烈女傳
特被褒賞禮部會試兩為同考試官時推其公為人美
丰儀善談論尤喜客所居軒楹清曠几席整潔佳花異
卉雜植前後客來詠歌觴酌歡如也其雅懷灑落蓋如
此年五十有三所為詩文總六卷前後所錄多手筆云

侍郎章敞

章敞字尚文浙江會稽人永樂癸未領鄉書首薦明年
登進士選入翰林為庶吉士與修永樂大典授刑部主

事時西山有劫盜詔捕之急捕者掩執行路數百人以聞命刑部覆訊之敵辨其枉惟一人實盜以故陞本部員外郎尋遷郎中起復改吏部宣德庚戌擢行在禮部右侍郎奉詔往安南命黎利權署國事暨宣詔利遣人白相見禮敵語之曰吾奉詔命至爾蓋小國一酋長能盡禮於使者即所以尊敬朝廷何以白為利聞即趨拜坐於下令所親給侍左右數為巧媚辭欲眩以聲色敵正色待之終不為動及還餽贐珍異一無所受利死復

奉命令利子麟權署國事却所贐如初英宗嗣位之初平陽王復封蜀王以故護衛官軍田廬為請啟受命往理之至則較其軍數量以田廬與之餘給於民還奏上嘉之未幾遷左侍郎啟蒞政思慮精審防範周密以國家統理天下既久典禮品式有因革輕重之殊事或隨時損益有先後矛盾之異而吏胥亦稍緣此為奸於是白尚書胡公灤取國初至今凡所行條格集記之付四司使得叅酌而行事獲適宜奸弊頓革嘗有點吏嗜酒

急事且增損公牘即寘於法羣吏自是悚息不敢為非
太醫院每舉醫者人往往假以復怨及徵至多不諳醫
敵察知之遂偕尚書奏革其弊比歲僧道歲給度牒輒
以千計乃與尚書請依洪武例三歲一給凡僧道出家
及舉為僧道官者止於所居封內不容越籍冒濫四夷
貢使日給廩餼庖人每侵尅之敵聞之曰小人為口腹
計而使朝廷薄棄遠人之禮可不禁乎即令有司具日
給之數付通事者或給不如數乃從而督治自是遠人

以為朝廷待之加厚焉正統丁巳卒年六十二上嗟悼
之遣官諭祭命有司營葬事啟在禮部時尚書胡濱政
尚寬大敵以嚴肅佐之於吏欺雖小不恕遇事不肯姑
阿依隨士林多服其剛毅云

侍郎王士嘉

王士嘉字道亨山東武城縣人永樂初繇監生擢山陰
知縣在任有廉明之稱尋陞陝西按察司僉事未幾改
工部員外郎久之陞北京工部郎中宣德七年陞陝西

右叅政所至清譽著聞正統元年召為禮部右侍郎七年以老致仕卒年八十七訃聞遣官諭祭士嘉儀觀魁偉性度開爽為人狷介不苟歷仕五十餘年家無餘貲士林高其行子平登進士為翰林檢討陞河南按察司副使怒撻教官反為所屈疽發背面卒士嘉知玉性剛躁乃居近侍恒以為憂及聞外補喜曰吾家無累矣工部尚書吳中同學友也士嘉薄其不慎名檢中每見之不覺自失焉

禮部志稿卷五十五

欽定四庫全書

史部

禮部志稿卷五十六至五十八

詳校官監察御史臣龔駿文

編修臣程嘉謨覆勘

總校官知縣臣楊懋珩

校對官學正臣翁樹棠

賜錄監生臣羅善慶

欽定四庫全書

禮部志稿卷五十六

明 俞汝楫 編

列傳

侍郎王直

王直字行儉江西泰和縣人永樂甲申進士選為翰林庶吉士授修撰成祖巡幸北京仁宗監國翰林留黃淮楊士奇與直三人輔導及來北京與修太祖實錄未成

以憂去服闋陞侍讀仁宗即位進侍讀學士宣宗嗣位
與修兩朝實錄成陞少詹事仍兼侍讀學士英宗即位
與修宣宗實錄為總裁書成陞禮部左侍郎尋出視禮
部事正統癸亥陞吏部尚書己巳秋北兵犯邊上欲親
征直率廷臣上章諫止不報命留守京師既而加太子
太保景泰中陞少傅太子太師天順改元上復位辭師
傅之職未幾致仕卒年八十四訃聞贈特進榮祿大夫
太保謚文端仍勅有司奠祭直偉貌修鬚端謹持重望

之如神仙中人在翰林三十餘年屢為考官得人為盛
經筵進講辭旨明暢出蒞禮部尚書胡濱大喜閩部之
政悉付之直處之裕如若素習者在吏部廉慎自守居
家儼然子弟不敢近為詩文條暢簡潔在二十八宿中
登顯位成大器者惟直為最與學士王英齊名而行檢
過之

侍郎王英

王英字時彥江西金谿縣人永樂甲申進士選為翰林

院庶吉士丁亥擢修撰秩滿陞侍講成祖北征英扈蹕有勞蹟比宴駕榆木川英與尚書蹇義等議喪禮仁宗嗣位進侍講學士尋陞右春坊大學士仍兼舊職支二俸宣宗登極與修兩朝實錄陞少詹事仍兼舊職母喪命有司壘祭遣中使護行遂起復英宗即位修宣宗實錄為總裁官書成陞禮部左侍郎仍兼侍讀學士八年癸亥正月奉旨出理部事乙丑浙江台寧等處民遭疫死甚衆上遣賚香幣往祀南鎮以禳民厲時浙間久旱

英至紹興大雨水深三尺灌獻之夕雨止星見明日又
大雨田野沾足人皆喜曰此侍郎雨也布政司孫原貞
等作御祭感應記刻石於廟而還丙寅奏京師去冬少
雪今年自春徂夏雨澤不降種不入土小民缺食此皆
臣等政事不修所致伏望陛下施賑恤之恩臣等宜益
修愆戒飭仍乞齋沐祈禱以格天心上從其言果大雨
五日先是奏請致仕不允至是年七十乞罷政復不允
戊辰八月特旨陞南京禮部尚書景泰元年卒謚文安

遣官諭祭安葬英屢為會試考官多得名士其文章典雅一時重之尤善草書解縉以後一人而已然豪縱跌宕不拘小節頗有晉人風度云

侍郎錢習禮

錢習禮名幹以字行江西吉水人自幼喜學才敏思深文多腹稿人莫不奇其才以江西解魁登永樂辛卯進士第選為庶吉士尋授檢討仁宗即位乃進侍讀知制誥與修兩朝實錄成進陞學士正統乙丑特勅陞禮部

右侍郎時朝廷稽古右文事多繇禮部尋命兼署吏部
事益敬畏不自安連章求去遂致仕卒年八十九勅有
司營墓祭謚曰文肅習禮恬靜少慾篤於倫誼處已侍
人恭而有禮在翰林三十餘年以文章議論為士類所
推重引年退休不廢文墨

侍郎王一寧

王一寧浙江仙居人十三能詩父峻用任國子監丞一
寧從侍時仁宗在春宮以其善撫琴召見命賦早過銀

河詩嘉之使就國子監讀書登永樂戊戌進士授吏部
稽勲司主事於文華殿供事考滿改翰林修撰預修宣
宗實錄書成進侍講兩被命為京闈考官正統十三年
遷禮部右侍郎景泰初勅往湖廣督理軍餉明年召還
陞本部左侍郎兼翰林院學士命入內閣預機務以中
官王誠輩嘗受業焉報其私恩也壬申易儲進太子少
師仍兼舊職尋卒於官賜謚鈔祭葬贈太子太保禮部
尚書謚文通一寧性敏捷詞翰清俊然不慎名檢君子

無取焉

侍郎章瑾

章瑾字用欽浙江會稽人父敞為禮部左侍郎自幼失恃英爽卓立甫十餘歲為文辭已蔚然宣德丙午其父與吏部尚書趙新同為吏部郎中趙公見其非常人喜而以女歸之是歲舉順天府鄉試丁未庚戌連試禮部不第癸丑又試名在副榜時朝廷慮俊秀拘於科額必有遺才在副榜者命翰林復選得二十四人授冠帶給

以所當得之祿俾卒業俟後舉正統丙辰中禮部會試第七廷對賜進士出身觀政兵部踰年以父喪服闋擢禮科給事中時天下亢旱承命祀南海神沛澤斯應數年為同列所推薦遷都給事中景帝嗣統拜禮部右侍郎既而廣東盜賊竊發命撫廣東兼治羣盜瑾聞楊信民素為廣州之民信服以詐誤謫守邊關力言於上起信民為右僉都御史瑾因疾未行於景泰元年卒年四十四後信民至廣東民有被脇從為盜者聞信民至相

率來順歸者凡數千人不負所薦云

侍郎儀銘

儀銘字子新山東高密縣人前禮部侍郎謚文簡智之
子以父廕入太學授給事中陞翰林院修撰宣宗實錄
成陞侍講正統五年陞郎府長史持正不阿有承奉抗
王儀即日劾奏之朝廷責承奉而撻之景泰初銘以潛
邱舊恩陞禮部左侍郎明年陞南京禮部尚書景泰三
年召還陞太子太保兼兵部尚書仍兼掌詹事府事嘗

因災異言弭變之方在敬天法祖用賢納諫省刑薄斂節
用愛人遂錄皇明祖訓并進以致警戒之意深見獎納
推恩三代皆如銘官五年以疾卒遣官諭祭賙鈔萬緡
贈特進光祿大夫左柱國太師謚文襄命有司治葬事
錄其子海為錦衣衛百戶銘雖短於才學然質實負氣
遇事侃侃不屈雅志儉樸仕宦三十年惟守舊廬論者
謂其不愧乃父云

侍郎儲懋

儲懋直隸丹陽縣人永樂甲午舉人十三年授台州府學訓導有學行二十二年擢吏科給事中正統元年選充經筵陞翰林修撰三年與修實錄陞侍講八年陞戶部右侍郎十四年轉禮部左侍郎為人端重寬和士林推重景泰元年兩京災異迭見給事中葉盛與都給事中李寶等欲草各藩鎮中官因約羣臣會奏尚書金濂等皆佯贊可行無實心會南京學士周叙言事中及之未幾兵部因他奏官多民擾乞將各處公差內外官員

量取回京有旨內官不動又數日奏議及周叙奏有言此亦有例見行懋即揮筆批定盛因曰此誠民病今既有言者若合辭上請或可從而衆不能然識者惜之二年知貢舉嚴闢防無私弊尋陞南京戶部尚書未任卒於京

侍郎李實

李實字孟誠四川合州人正統乙丑進士授禮科給事中英廟留北庭衆議遣使奉迎而未決實昌言於朝謂

奉迎之使在所必遣不然則曲在我衆難其人實請行
遂陞禮部右侍郎使北還陞右都御史巡撫湖廣英廟
復辟有上其所著北使錄言多虛誕用是黜為民尋召
起於家行至南陽御史龔峩等劾之謂實輕佻小人素
無行檢不宜復用有旨令移文止之命下實已至京因
自叙歷任功代具奏申辨且引漢文季布事為言復為
御史董勗所劾詔實既不用何若等又言之命以原職
致仕實滑稽有口辯頗恣肆不檢在湖廣以贓貨聞士

論鄙之然使北庭能不屈於敵肆言辭折令人敬憚車駕之還未必為無助云

侍郎薩琦

薩琦字廷珪係出西域後為福建閩縣人宣德庚戌進士宣宗詔楊士奇簡庶吉士入讀中秘書取琦第一命太和王直教之正統元年授翰林院編修預修宣廟實錄三年陞本院侍讀景泰三年缺禮部右侍郎時易儲之議漸萌內侍疏於上令用學士為之大學士陳循舉

學士劉鉉以進時江淵不悅鉉言鉉素不能幹事不可用乃薦琦陞禮部右侍郎兼詹事府少詹五年卒於官上遣官諭祭命有司營墓琦為人狷素不苟合文學亦有可稱在禮部雖無建明而自守甚篤人亦無所非議云

侍郎章綸

章綸字大經浙江樂清縣人正統乙未進士授南京禮部主事陞禮部郎中景泰中適有天變監察御史鍾同

建言宜令諸司各陳所以致變者因以復儲事諷禮部大臣聞者畏縮不敢對綸即具疏言十四事曰畏天戒任燮理養聖躬節倖御務儉約勤論政惇孝義慎賞賚重名爵革巡撫擇重臣辨異端却貢獻汰冗官皆切中時弊其惇孝義一條尤為剴切曰聞古之帝王所以德教加於百姓刑於四海者不過乎孝悌而已伏惟上聖皇太后及皇太后兩宮為天子母尊之至也皇上以天下養養之至也臣願退朝之暇必觀兩宮而修問安視

膳之禮太上皇君臨天下十有四年是為天下之父也
與皇上一氣所生是為至親之兄也皇上嘗親受其冊
封是為上皇之臣也車駕遠狩漠北而詔旨傳位陛下
陛下尊之為太上皇帝是為天下之至尊也伏讀奉迎
還宮之詔有曰禮惟有加而無替義當以卑而承尊臣
望皇上於朔望日或節日一至南宮率羣臣朝見上皇
於延安門以叙同氣之情極尊崇之道可也皇上即位
之初詔冊妃汪氏為皇后其後詔立太子復冊其母杭

氏為皇后不意太子薨逝此事既往固不必言然而中宮儲位不可久虛臣望皇上復后汪氏於正宮詔沂王復居儲位如此則五倫全備和氣充溢天心自回災異自弭矣臣非不知逆耳之言而身必危但臣身輕而朝廷為重使朝廷安則臣身雖死亦無憾矣疏上留中不出遂偕同下錦衣衛獄考訊備極薑楚俄大風揚沙天
地晝晦獄得稍緩已而南京大理寺廖莊疏至亦言復儲事然未暇究他日莊秩滿陞見即命杖之幾死乃復

命杖綸同各一百同竟死獄中及英宗復位首詔釋綸
而檢其疏無所得或有能畧舉其詞者即日擢禮部右
侍郎尋為石亨楊善所短調南京轉南京吏部天順八
年朝廷有大喪綸請止大婚禮不從秩滿遷左侍郎久
之致仕家居十九年卒年七十訃聞賜祭葬如例後其
妻張氏因陳情乞贈謚始具其疏稿以聞上覽奏嘉其
忠贈禮部尚書謚恭毅綸為人質直坦易與人交表裏
洞達少好學至老讀書不廢然性執泥於世務不盡通

若其忠節炳然則為後世所敬仰云子玄應舉進士授給事中為湖廣布政司參議

侍郎李紹

李紹字克述江西安福縣人宣德癸丑進士選為翰林院庶吉士正統初授翰林檢討與修宣宗實錄既而以剩員汰歸未幾景泰即位召充經筵官陞修撰歷司經局洗馬兼修撰右春坊右庶子兼侍講天順初改尚寶司卿仍兼侍講轉翰林院學士尋陞禮部右侍郎時有

結權貴相軋者以紹奏字多南音沮之英廟弗聽且曰禮部不可無此人癸未會試紹專知貢舉防範甚嚴頗革宿獎修英宗實錄充副總裁書垂成以疾力求解任歸其後國子祭酒為其屬所搆吏部尚書姚夔言隆師道非宿儒重望不可援洪武初起致仕尚書劉崧署司業故事虛祭酒位馳勅召之命至紹己卯紹體貌修偉性剛直有器局刻志學問持論平正統中英廟常訪人才少師楊士奇疏五人以對紹居其一後居高位好獎

勵後進聞人有善輒稱譽之為文有法度不尚奇詭好古博學積書甚富凡所有者無不究覽焉紹卒時年六十有五訃聞賜以祭葬子璫為雲南布政使

侍郎葉盛

葉盛字與中直隸崑山人正統乙丑進士授兵科給事中進都給事中己巳之變朝廷多事言路大開六科聯署建請多盛倡之一時名稱翕然景泰壬申陞山西右參政督糧宣府尋命協贊獨石等處地方軍務請復棄

城闢草萊葺廬舍積糧芻撫士卒立社學醫學置義塚
煖鋪又請出內帑銀買牛種教民耕種多所收獲以父
喪去位天順改元英宗召至京面加獎諭擢都察院右
僉都御史巡撫兩廣請終制不許適朝命大將顏彪專
征盛參贊其軍務成化初遷左僉都御史巡撫宣府墾
田益廣以所積餘糧鬻戰馬千八百匹修屯堡七百餘
所召入為禮部右侍郎改吏部敵寇延慶命往議戰守
方畧以歸遷左侍郎卒年五十五命官祭葬如例特賜

謚文莊盛清修好學攻詩能文留心世務其在宣府多所建置事皆經久可行邊人至今思之但在兩廣不能戢下以致官軍戢平人以為功又以峒蠻出沒不常自古無善處之術每禁有司不許擅申盜賊必俟年終彙奏識者頗非議之然其功業所就亦一代偉人云

侍郎萬安

萬安字循吉四川眉州人正統十三年進士選為翰林院庶吉士授編修陞左春坊司直郎尋陞右春坊右中

允改尚寶司丞轉侍講陞學士詹事府少詹事陞禮部
左侍郎成化五年薦學士入內閣參機務歷加少師兼
太子太師吏部尚書華蓋殿大學士二十三年致仕弘
治二年卒訃聞輟朝一日贈太師謚文康賜祭葬如例
安狀貌魁岸儀觀甚偉自未第時人皆知為偉器及官
翰林受知憲廟在內閣者幾二十年恩禮隆厚而又當
海內熙洽之餘其遭際可謂盛矣顧其為人外寬內忌
惡人異己若禮部侍郎邢讓國子祭酒陳鑑司業張業

皆以無罪誣罷官益安與學士彭華謀居多而吏部尚書尹昊之得禍則尤華所媒孽而安陰主之也是時指揮萬通為昭德內妃兄弟有寵安以同姓結通為族江西李孜省鄧常恩等時以左道獲寵因使華通孜省常恩為助而安益陰厚之以是安勢益盤據凡才賢勝已持正不趨附皆妬嫉之末年益斤逐名士以藉人口時雖側自然未有敢攻之者會孝宗即位有詔不許言官風聞糾劾衆遂譁然謂詔草仍安所為以自為己地者

於是御史湯鼐庶吉士鄒智等皆極論之遂勒令致仕中外稱快蓋安之輔政惟黠貨好內以利其身家為事而於人才治體漠不槩意又慮人以是議已遂益結勢力威以制之故得致仕人猶以為幸云

侍郎邢讓

邢讓字遜之山西襄陵縣人繇進士改庶吉士授翰林檢討考績陞修撰景泰元年北人遣使請和奉送英廟還京上屢以敵情多詐為疑及回使多不具迎復事讓

上奏首以前次勅書不具迎復上皇之意為言衆服其
剴切英廟復辟命與修大明一統志成化二年陞國子
監祭酒五年陞禮部右侍郎七年以費用國子監會饌
錢鈔無歸著除名初讓為祭酒欲聲聞出前人上創立
勅諭學規等碑修國子監通志躬課諸生誦小學以及
諸經痛懲謁告之弊人以是稱譽之其致毀亦以此免
歸數月卒年僅四十五讓負才氣詞翰亦清勁然強忍
狹中意所輕重人輒形辭色銳意柄用而勢力相軋者

忌之卒以及禍

侍郎雷復

雷復字景暘湖廣寧遠縣人正統丙辰進士改庶吉士授行人擢監察御史陞廣西副使分巡蒼梧道時藤縣民胡趙成構集大藤峽猺賊攻陷縣治荼毒一方復承巡撫葉盛檄往討之擒斬成等五年陞山東左布政使七年陞禮部右侍郎八年改右副都御史巡撫山西十年卒於官賜祭葬如例復清雅端謹歷任中外所至守

法度循矩規無非分之為侍郎未久以短於敷奏出外
然在邊行事多得宜人至今思之

侍郎劉吉

劉吉字祐之直隸博野縣人正統十三年進士改翰林
院庶吉士授編修景泰元年充經筵官預修寰宇通志
成陞修撰天順間侍憲廟於春坊講讀預修大明一統
志丁內艱起復成化改元陞侍讀英廟實錄成陞侍讀
學士兼經筵講官五年陞禮部右侍郎八年轉左侍郎

遣祀東嶽等神十一年命兼翰林院學士入內閣參預
機務歷加少師兼太子太師吏部尚書華蓋殿大學士
弘治五年乞致仕許之踰年卒贈太師予謚文穆賜祭
奠如例吉性沈毅喜怒不形於色遇事能斷在內閣最
久上始即位尤委任之恩遇最盛凡綱紀政事進退人
才言率見聽隱然有內相之重然所與厚善者多讒謠
面諛之人致不能自聞其過廷臣有不悅者輒使言官
劾去之故議者謂其乏休休有容之量而其後聖眷亦

漸哀云

侍郎尹直

尹直字正言江西泰和縣人景泰甲戌進士入翰林院為庶吉士預修寰宇通志成授編修憲宗初御經筵充講官成化三年纂修英廟實錄成遷侍講八年擢侍講學士十一年陞禮部右侍郎以父憂去任十五年起復改南京吏部轉南京禮部左侍郎二十二年特召為兵部左侍郎尋薦翰林院學士入內閣參預機務二十三

年致仕家居二十四年卒賜祭奠謚文和直明敏軒豁
少有才名在禮部嘗因天變會官具疏陳修省二十二
事言多切中時弊歲當開度僧道連章奏省之又請汰
黜天文陰陽生之詭籍者凡數百人始至兵部貴州鎮
巡官奏苗叛請發兵夾攻廷議將從之直獨言吾自東
南來未聞有警豈可聽彼邀功啓釁以疲民乃請選委
御史部屬二人往勘貴州果無警居內閣時有建明會
言官劾其進用不合公議孝宗薄之然尚慰留待之辭

乃令致仕直為人疎俊不拘小節亦頗以才氣自負以是多招物議為文章贍逸渾健步驟大家所著有歷代名臣讚皇明名臣言行通錄行於世

侍郎俞欽

俞欽字振恭浙江新昌縣人景泰辛未進士選為翰林院庶吉士授禮部儀制司主事儀制務繁縟欽才贍學充通悉今古事無留滯天順戊寅陞郎中壬午以郎中績最當加封其父于時祖尚在堂疏乞移封上嘉之特

賜其祖冠帶欽秩方五品而褒及其父實曠世殊典癸
未會試試院火左遷松江府同知成化改元召還改兵
部武選司郎中乙酉以從征山都掌蠻寇有功陞太常
寺少卿壬辰奉命禱祀淮瀆之神還擢禮部右侍郎朝
章典故素所明習凡國家大禮事處之井井有條乙未
陞左侍郎戊戌皇太子出閣加冠詔有司議定禮儀乃
參酌備具朝廷采用之庚子遭父憂去職壬寅冬服未
闋詔起兵部左侍郎制終乃就任九年秩滿加正二品

俸尋卒於官年五十四訃聞賜祭葬如例欽通敏有才幹處事善思慮而不失正所歷皆號稱職益能臣也時將以重任畀之而欽忽報卒聞者多為憫惜云

侍郎謝一夔

謝一夔字大韶江西新建縣人天順庚辰進士第一臚傳之旦喪然衆中縉紳屬目除翰林院修撰憲宗嗣統進侍經筵被賞賚預修英廟實錄成陞左春坊左諭德又預修續資治通鑑綱目成進學士未幾擢禮部右侍

郎陞工部尚書年六十三以疾卒於位贈太子少保賜
祭葬一夔為人和易平實與人交久而益親尤篤於友
義為文章不奇詭雕刻其為諭德時嘗疏陳五事言頗
剴切在禮部凡制度儀文多所裁定前所未有者必稽
經據史參以時制具為儀注務使可行一時同事者咸
推其練達但務交好而不重操執其政事不能無徇情
云

侍郎徐溥

徐溥字時用直隸宜興縣人景泰五年進士第二人及第授翰林院編修英宗復辟命兼司經局校書侍東宮講讀憲廟登極錄舊勞遷左春坊左庶子兼侍講充經筵講官纂修英廟實錄五年陞翰林院學士九年秩滿陞詹事府少詹事兼侍讀學士十六年陞太常寺卿兼學士掌翰林院事十七年陞禮部左侍郎二十三年改吏部孝宗即位首膺簡入內閣參預機務歷加少師兼太子太師吏部尚書華蓋殿大學士尋以目疾累疏乞

歸乃賜勅給驛遣官護送還鄉踰年卒年七十二訃聞
輒朝一日遣行人諭祭者九命有司營奠贈特進左柱
國太師謚文靖溥立朝四十餘年在翰林院不以文學
名歷部事安靖以和處寮屬及進內閣因事納約登崇
俊良隨才器使嘗有大獄干宗藩連貴近衆謹不能決
皆力贊成之蓋從容委曲以助成天下之務者其功為
甚多平居容儀儼雅溫易可親度量宏裕而包含不露
人皆飲醇仰德無怨惡者為詩文清潤有思致而酷好

古法書名畫至老不倦云

侍郎張悅

張悅字時敏直隸華亭縣人天順四年進士授刑部主事轉員外郎歷陞江西按察司僉事浙江提學副使四川按察司按察使丁憂服闋改湖廣按察使進都察院僉都御史工部侍郎弘治元年遷禮部右侍郎再轉吏部陞南京右都御史南京吏部尚書改南兵部參贊機務累乞休致加太子少保致仕未幾卒訃聞贈太子太

保賜祭莫謐莊簡悅學問該博操行清謹其提學浙江
杜絕請謁甄別才器尤為士類所信服在湖廣執法不
阿在吏禮二部風裁益峻至參贊機務時雖久疾稍不
移然猶持大體卒能奉身而退始終之際蓋亦無貶議
云

侍郎費闇

費闇字廷言鎮江丹徒人成化五年禮部會試第一遂
第進士選為翰林院庶吉士授編修同考禮部與經筵

陞國子司業秩滿陞左春坊左諭德仍管司業事未幾
陞祭酒弘治元年孝廟初開經筵簡充講官車駕幸學
賜坐講彝倫堂褒諭宴賚士林榮之及直日講遂改少
詹事兼侍讀同修憲廟實錄成進詹事兼侍讀學士再
越月擢禮部右侍郎病滿三月例停俸詔特不允尋卒
年五十有八上遣官諭祭命有司為營葬事闇長身偉
貌議論亹亹臨事變通慷慨且恭謹自持人恒以公輔
期之其在國學最久士子多所造就在禮部亦能持謹

人惜其不及大用云

侍郎王華

王華字德輝浙江餘姚縣人成化辛丑狀元及第授翰林院修撰預修憲廟實錄進左春坊諭德充經筵日講官選侍東宮講讀陞翰林院學士主考兩京鄉試陞詹事府少詹事教習庶吉士預修大明會典通鑑纂要陞禮部左侍郎南京吏部尚書忤逆瑾遂傳奉致仕家居十餘年卒子守仁平逆濠有功封新建伯贈華如子爵

命給祭奠如例華才識宏達操持堅定為禮部時方賊瑾用事士大夫爭奔走其門華獨不之顧子守仁方為兵部主事上疏論瑾罪惡瑾怒逐守仁顧素敬慕華不輒遷怒間以語人諷若一見內閣之位可立躋華不往及轉南京瑾又使人言華不久當召用冀得往謝華竟不往其生平大節如此

侍郎張璫

張璫字仲湜廣西全州人成化戊戌進士改翰林院庶

吉士授編修弘治己酉秩滿陞侍講戊午選侍東宮辛酉主順天鄉試乙丑陞侍讀學士尋陞學士國子祭酒正德丙寅三月駕幸太學賜坐講尚書丁卯陞禮部右侍郎改左己巳陞南京禮部尚書辛未改吏部時儲位久虛草疏率同儕請建太子罔有顧忌甲戌改兵部參贊機務條陳八事又奏草守備廳審事官及營伍有所委任不容請托人皆服其明決乙亥夏乞歸田里疏十五上始得請特加太子少傅給驛還尋卒賜祭奠如例

璵性頗剛褊與人多不合其在戶部請查追遠年逋賦
論者謂劉瑾方事誅求而其跡涉承望於賢者不能無
責備云

侍郎靳貴

靳貴字道充直隸丹徒人弘治庚戌進士第三人授翰
林院編修丙辰皇太子將出閣講學詔選正人以端國
本戶部尚書呂鍾以貴名上遂兼司經局校書未數日
官僚環侍皇太子獨指貴問左右曰非靳先生耶固已

目屬之孝廟幸講所尤加獎異庚申進右春坊右中允癸亥會典成進左春坊左諭德兼翰林院侍講每侍講筵敷奏雍容儀觀修偉重瞳屢回武宗登極以舊學陞太常寺少卿兼侍讀充日講尋以母憂去終喪仍舊秩掌翰林院事授庶吉士業正德四年進禮部右侍郎時逆瑾盜政常因事諷貴密書翰林官殿最以進貴不從銜之時翰林多外遷貴亦左遷為光祿寺卿已乃復舊薦更吏部進兼學士管誥勅掌詹事府事又進禮部尚

書甲戌遂擢文淵閣大學士加太子太保戶部尚書武英殿大學士致仕卒贈太傅謚文僖貴為人豐夷端粹發言有章為文本經術有理致在科場崇雅黜浮所刻文出其手者多典重敷腴號為博雅獨周旋權宦不失富貴晚既家居猶悒悒不解薦譽舊德者竟莫之及云

侍郎吳儼

吳儼字克溫常州宜興縣人成化丁未進士選翰林院庶吉士己酉授編修丙辰同考禮部試又充經筵講官

武宗出閣兼司經局校書庚申陞左春坊左中允辛酉
轉南京翰林院侍講學士正德丙寅召還纂修孝廟實
錄充經筵日講官兼修玉牒丁卯主考順天府鄉試時
逆瑾恃寵招權傾陷正直第二場以為臣不易命題瑾
已心惡之又聞儼家巨富陰遣人啗以美官儼峻拒之
瑾益慚怒媒孽無所得會朝覲考覈外官以不根之語
罷之瑾誅起用仍舊職未幾擢南京禮部右侍郎壬申
召還禮部乙亥轉左侍郎持節冊封益府丙子陞南京

禮部尚書丁丑武宗北幸宣大偕府部大臣上疏切諫
己卯卒於位贈太子少保謚文肅儼性方嚴操履清慎
居鄉有士行閨門亦整肅當官臨事期於自立秉經識
禮多合古意為文章莊重簡古詩詞清嚴可諷

侍郎石璫

石璫字邦彥直隸藁城人成化丁未同兄玠登進士被
簡為庶吉士弘治己酉授翰林院檢討與修大明會典
同考禮部會試少師李文正每謂諸後進可托以柄斯

文者其石氏季方乎辛酉充經筵展書官乙酉滿九載
遷修撰同修孝宗實錄正德丙寅武宗初開經筵充講
官尋遷南京翰林院侍讀學士己巳擢南京國子監祭
酒庚午改北監尋陞南京吏部右侍郎乙亥改禮部丙子
轉左侍郎丁丑命兼翰林院學士掌院事未幾召入內
閣參預機務歷少保武英殿大學士卒謚文隱

侍郎王瓊

王瓊字思獻浙江永嘉縣人博學雄文下筆數千言不

滯弘治丙辰進士第二授翰林院編修十二年丁憂十六年補原職正德二年陞本院侍讀三年陞國子監司業五年陞南京國子監祭酒六年南京禮部移文本監撰述慶賀皇上尊慈聖康壽太皇太后慈壽皇太后表文瓊以非奉旨意不敢撰述答之部復查有成化二十三年舊規本監乃與南京翰林院公同撰述八年改國子監祭酒為人坦直未嘗斂怨北監諸生愛戴之十一年尋陞禮部右侍郎十三年轉左侍郎十六年以議大

禮調南京禮部左侍郎嘉靖元年丁憂卒贈禮部尚書

侍郎顧清

顧清字士濂直隸華亭人弘治壬子南畿鄉試第一明
年舉進士改翰林院庶吉士授編修與修大明會典成
陞侍讀正德初與修孝廟實錄時逆瑾擅權清守正不
阿瑾銜之矯詔追論會典事以不諳政事為名降編修
尋調南京兵部員外瑾誅復任侍讀陞侍讀學士掌院
事教習庶吉士陞少詹事兼學士充經筵日講官兼修

玉牒儲位尚虛請預定不報武宗數巡幸清屢疏請回
鑾言甚切尋陞禮部右侍郎與宗伯毛文簡公協心秉
正會郊祀且迫而駕尚未還清草疏數百言上之上亦
為感動武宗崩世廟入繼大統會議迎駕冊立勸進頒
詔易服臨喪諸吉凶大禮清援古證今折衷羣言時以
清所議為得體從清居多有忌清欲傾之者嗾臺諫摭
他人事誣清不根特甚衆論囂然內閣持之不下而清
從容鎮靜因詔例自引退無少滯滯一時皆為清不平

久之輿論益定於是南北臺諫并撫巡上章論薦者四十餘人上乃起清南京禮部右侍郎清既歸自喜甚適絕意仕進不謂復有簡命不得已之任兩疏乞歸不允歸志已決疏益懇得俞旨陞南京禮部尚書致仕先是清以進徽號賀表上京師至東昌聞命時已力疾猶輿疾而進遂卒於河間府瀛海驛特詔賜祭奠謚文僖清好學敦節行士論重之

侍郎賈詠

賈詠字鳴和河南臨潁人弘治丙辰進士改庶吉士授編修充經筵講官正德初逆瑾亂政調兵部主事改禮部員外郎瑾誅復原職陞左春坊左中允轉侍講學士掌南院篆尋拜南京國子監祭酒改北世廟登極擢禮部左侍郎奉命詣承天上獻皇帝尊號還改吏部掌詹事府事進禮部尚書入內閣輔政累主考鄉會試久侍講經筵修武宗睿宗實錄明倫大典充總裁嘗召對平臺上親灑宸翰以賜以大獄事詐誤乃引疾乞休居鄉

二十餘年以醇厚聞壽踰八十詔有司存問卒贈太保謚文靖賜祭莫如例

侍郎朱希周

朱希周直隸崑山人弘治丙辰進士第一授翰林院修撰尋以纂修大明會典成晉侍讀歷陞禮部右侍郎擢南京吏部尚書希周學行醇篤性恬於世利居官守正
在禮部能舉其職為南吏部以考察庶官無所阿徇忤執政意令再考遂抗疏乞歸士論高之卒贈太子太保

謚恭靖賜祭奠如例

侍郎劉龍

劉龍山西襄垣縣人弘治己未探花廷對勸上崇敬畏
儆逸懲獎忠斥佞建中和之極為禮樂之本使政出於
一而達之天下擢編修進修撰正德初忤逆瑾出為兵
部職方司主事五年陞吏部考功司員外郎持正不苟
本年復修撰十一年陞侍講學士十五年改侍讀學士
嘉靖元年陞禮部右侍郎丁憂四年復除右尋轉左侍郎

年陞南京禮部尚書八年改南吏部十二年改南京兵
部尚書所至砥節礪行不與世浮沈為講官講誠能動
物章引黃河清為証勸世廟謙以履盛約以持盈感溢
天顏又抗疏論太后廟見并集議弭災十事又議宣大
邊務六事衆多贊其言

侍郎何塘

何塘河南懷慶人弘治壬戌進士改庶吉士授翰林院
編修正德初預修孝廟實錄成陞修撰忤逆瑾投劾移

疾去瑾敗召復故職癸酉充經筵講官有旨出為開州
同知遷東昌府同知引疾致仕世廟登極起為山西提
學副使累陞南京工部侍郎改工部左侍郎尋改戶部
嘉靖八年轉禮部移病疏免以言者留擢南京都察院
右都御史道家遂上疏不起詔准致仕尋卒塘孝友峻
潔以古人自期博學篤行嘗以象山慈湖之學流入禪
定謂為充塞仁義其學術梗槩如此性淡泊絕無嗜好
土室縞衣晏如也塘既沒詔錄其一孫賜謚文定給祭

莫如例

侍郎顧鼎臣

顧鼎臣蘇州府崑山縣人登弘治乙丑進士第一授翰林院修撰進侍讀翰林院學士嘉靖十年陞禮部右侍郎改吏部左侍郎陞禮部尚書掌詹事府事加太子太保進文淵閣大學士尋加少保兼太子太保武英殿大學士卒於位遺疏勸上親賢愛民保護聖躬上覽之憫悼輒視朝一日賜祭葬如例遣官護其喪還鄉贈太保

謚文康鼎臣性樂易無町畦自在講筵即受知於上特
詔免其朝參令專講洪範已從掌詹陟內閣輔政上南
幸承天命之居守輔皇太子監國其任如此然其在政
府充位而已

侍郎黃宗明

黃宗明字誠甫浙江鄞縣人正德甲戌進士授南京武
庫司主事陞武選司員外郎宸濠反上江防三策上諫
南巡疏武宗幸南都百官服罩甲衣以朝宗明約言官

面奏不宜服喪衣不果遂告病歸尋起為南京刑部郎
中會議大禮宗明與張桂意合遂名連署疏上陞吉安
知府轉福建運使召修明倫大典以母憂不至服闋陞
光祿寺卿撰光祿須知為疏以進上嘉之著為令又應
詔言四事一曰求才二曰勵志三曰定計四曰責任皆
切時弊陞兵部右侍郎時編修楊名以言事忤旨詔窮
治主者宗明疏陳非宜乃得罪出為閩省參政俄召
還為禮部右侍郎轉左侍郎尋卒於官初張桂以議禮

得幸諸同議者咸驅駕氣勢更相牽引乃宗明無比周
述故張桂既去人亦無訾之者蓋矜名自好士也

侍郎蔡昂

蔡昂直隸淮安人正德甲戌進士授翰林院編修以武
宗實錄成陞右春坊右贊善同纂修大明會典陞翰林
院侍講學士充日講官尋以失誤日講降調湖州府通
判逾年召復職管錄累朝及皇考寶訓實錄成陞翰林
院學士嘉靖十六年陞禮部右侍郎兼侍讀學士十九

年遷左侍郎兼官如故會慎簡官僚衆咸推昂改兼翰林院學士詹事府府丞未幾卒贈禮部尚書賜祭奠如例

侍郎馬汝驥

馬汝驥字仲房陝西綏德州人正德己丑進士改庶吉士授翰林院編修己卯中武皇帝且南狩諫者輒獲罪後縮莫敢諫者汝驥曰即畏罪寧不為宗廟朝廷所乎乃奮氣抗疏率諸同館士六七輩赴闕上之疏出其手

切直言巡游有隱憂伏禍不可上怒罰跪闕下五日已
又杖之諸上書者悉謫外而汝驥調澤州知州世廟登
極召復故職仍進俸一等以修武宗實錄成擢修撰尋
陞南京國子監司業改北監上幸太學充講官命坐講
言辨而正賜文綺居數歲陞南京通政又三歲陞南京
國子監祭酒遂擢為禮部右侍郎當是時嚴公嵩為宗伯
孫公承恩為左侍郎而上方興禮樂創制度諸大典更
起不絕諸公日聚講議而汝驥洽覽羣集習識今昔嚴

公賢之會嚴公拜相見上言馬侍郎賢上繇是知侍郎
因以其官加翰林侍講學士寵之而汝驥以疾卒於官
上悼焉為遣官致祭勅有司營墓贈尚書謚文簡汝驥
沈毅有大節其行已峭厲而性復和易可親益詞臣之
選也

侍郎朱廷立

朱廷立字子禮湖廣通山人嘉靖癸未進士授諸暨縣
令以治行高等徵拜侍御史己丑巡兩淮鹽政條陳鹽

法宜行事鹽遂通課益昔百七十餘萬辛卯巡按順天
又條陳六事切中時病壬辰巡按四川時土番夷釀亂
松潘梗貢道為邊患上怒命將征之勅立督其事立冒
險疾趨壁壘親授計將大舉兵會銜立者以他事罪立
使閒住無何功臣各膺爵賞潘都御史上其功上嘉嘆
懋賞復其官適順天缺督學御史遂推立焉丁酉陞南
京太僕寺少卿丁母憂起復為僉都御史擢大理卿陞
工部右侍郎己酉轉禮部右侍郎有嫉立軌己者譖諸

言官劾之復以閒云廷立薦於孝友持身訓家咸以禮平生不計議人過至於事關利害則喜力言之雖嫌罔避其多得謗亦以此云

侍郎程文德

程文德浙江永康人嘉靖乙丑進士第二授翰林院編修以楊名論吏部尚書汪鋐連下詔獄謫信宜典史陞陞兵部主事郎中廣東按察司提學副使南京國子監祭酒擢禮部右侍郎遷左侍郎改吏部尋加翰林學士

掌詹事府事教庶吉士簡撰玄文文德素講理學所撰
不稱旨會推南京吏部尚書上疑文德欲脫不經之奉
特旨調南京工部左侍郎文德疏辭勸上享安靜和平
之福上益怒以為謗訕削籍為民及卒貧無以殓文德
篤學修行稱為儒者好談當世之務嘗自以其學未究
於用而迂濶極行識者以為然後贈禮部尚書謚文
恭

侍郎孫陞

孫陞字志高浙江餘姚縣人前死節都御史燧之子舉
乙未進士第二人授翰林院編修以校錄列聖御文五
經二十一史成遷右春坊右中允復與修大明會典丙
午主應天鄉試晉國子監祭酒辛亥陞禮部右侍郎值
華亭徐公為尚書協恭一心諸大典儀如請行裕景府
冠讀禮商決居多癸丑改吏部旋丁內艱服除徵拜禮
部左侍郎旋改吏部丁巳進南京禮部尚書卒於官詔
贈太子少保謚文恪陞為人孝友長厚父燧死寧庶人

之難終身不書寧字亦不為人作壽父文事伯兄如父
居官被服雅素口不談人過益篤行君子也子鑑鉉鑑
鑑皆先後舉進士至通顯

侍郎閔汝霖

閔汝霖浙江烏程縣人嘉靖壬辰進士改庶吉士授翰
林院編修尋陞右春坊右中允歷左諭德翰林院侍讀
學士掌院事太常寺卿掌國子監事遂陞禮部右侍郎
遷左尋改兼學士教習庶吉士簡撰玄文復改吏部左

侍郎掌詹事府事進南京禮部尚書致仕汝霖謹有文以撰玄失上旨南遷尋罷同鄉進士董份復陷之竟鬱鬱而卒上聞賜祭奠如例

侍郎林爌

林爌字貞恒福建閩縣人尚書廷機之子嘉靖丁未進士改翰林院庶吉士授檢討選侍景恭王講讀滿九載擢修撰進司經局洗馬兼官如故與校錄永樂大典明年與纂承天大志尋志成賜金帛陞國子祭酒大典成

進太常寺卿祭酒如故遷禮部右侍郎兼翰林院學士
經筵開充日講官仍充世廟實錄副總裁改吏部右侍
郎無何改南京吏部久之始進工部尚書尋改南京禮
部尚書卒年五十七爌幼而朗秀讀書日恒數千言性
尤耿介不偶合當景王之國吏部以故事請相嵩時柄
政意猶豫曰史官侍王郎豈亦故事耶徐文貞公階方
副揆力為慤憲得母從之國相嵩念爌且造謝爌陽為
不悟也者不謝也嵩敗宦稍稍達其佐禮部則嵩文端

公儀為之長儀海內夙望長者虛心待之爌亦侃侃亡
隱多所裨益諸陵貴人以大水請修治冀得遂所欲爌
周視還奏惟長陵小毀當葺餘俱已之所省費以萬計
嘗再考會闈一典順天試及掌成均學門生故吏偏天
下其却真定鳳陽二守賂尤著嗜書手不時釋為文能
復古根柢理道不好為浮靡以躡名譽惜其早世不盡
究其用云

侍郎瞿景淳

瞿景淳字師道直隸常熟人嘉靖甲辰進士第二人及第授翰林院編修滿九載遷侍讀陞左春坊左諭德丁母憂歸服除守故官遷侍讀學士視翰林篆搃校永樂大典亡何以太常寺卿領南京國子祭酒事已即南京為吏部右侍郎三載當入奏績而會穆宗登極以禮部左侍郎召旋用大典總校勞兼翰林院學士仍佐部事食二品俸比朝留侍經筵修世宗實錄尋以病發疏乞骸骨遂予告歸歸一載而卒上為下所司治葬諭祭贈

禮部尚書謚文懿景淳為人醇謹以學行聞歷典試多所獎拔士論稱之

禮部志稿卷五十六